



Inatsisartunut ilaasortaq,  
Jens Napätök  
Partii Naleraq

## § 37 naapertorlugu apeqputip nr. 2019-087-ip akineqarnera

22-02-2019  
Suliap nr. 2019 - 4082  
Akt id. 10033469

Asasara Jens Napätök

Postboks 260

3900 Nuuk

Oqarasuaat (+299) 34 50 00

Naqitanik nassitsigasuaat +299

34 66 66

E-mail: iian@nanoq.gl

www.naalakkersuisut.gl

Apeqputinut nassiussimasannut qujanaq. Apeqputigineqartut tullinnguuttuni ataasiakkaarlugit uteqqinneqarput akineqarlutillu.

### 1. Naalakkersuisut taavalu pisortaqaqfinni tamani Angajoqqaat Illersuisuannik, angajoqqaat atugaannik ilisimasanik katersuiffimmik aamma siunnersuisarfimmik pilersitsiniarlutik pilersaaruteqarnerlutik?

Angajoqqaanik siunnersuisarnek kommuninit akisussaaffigineqarpoq. Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi § 20-mi siunnersuinnermut tunngasumi ima allassimasoqarpoq: ” *Kommunalbestyrelse meeqqamut, ilaqaataasunut imaluunniit meeqqap isumassuisuinut kiisalu angajoqqaanngortussanut meeqqap peroriartornera, atuarnera, ilinniagaqarnera, atugarissaarnera il.il. pillugit siunnersuisinnaavoq.* ”.

Naatsorsueqqissaartarfik ilaqutariit inuunikkut atugarisaat pillugit ilisimasanik katersuisarpoq, matumani suliffissaqannginnermi ikiorsiissutit erninersiutillu, pisortanit ikiorsiissutit, ineqarnermut tapiissutit il.il. Nittartagaq una innersuusutigineqarpoq:

[www.stat.gl](http://www.stat.gl)

### 2. Angajoqqaat arlaannik isumasioqatigiittarfimmik imaluunniit siunnersuisarfimmik ornitassaqarpat? Aap atornerarpat suna, sumi aamma qanorlu?

Angajoqqaajuneq aallaaviatigut angajoqqaat akisussaaffigaat, taamaakkaluartoq Naalakkersuisut angajoqqaat angajoqqaatut pissusilersornissaat patajaallisartuarpaat. Angajoqqaajunerup patajaallisarneratigut meerarpassuit pitsaaneruserumik peroriartornissaat qularnanngitsumik anguneqarsinnaavoq, pingaarnertullu angerlarsimaffiup avataanut inissiisarnerit ikilisarnissaannut iluaqutaasinnaalluni.

Angajoqqaanut toqqaannartumik siunnersuisarnerit aallaavimmikkut kommuninit akisussaaffigineqarput. Ulluni makkunani angajoqqaanut ingerlanerluttunut nalinginnaasumilluunniit siunnersorneqarnissamik pisariaqartitsisunut arlalinnik neqeroortissaqarpoq.

*MANU aqputigalugu pikkorissartitsinerit* angajoqqaanngortussanut angajoqqaanngorlaanullu tamanut neqeroorutaavoq, tassanilu ilaatigut meeqqap ineriartornera, angajoqqaatut pissusilersornissat, angajoqqaajunermullu atatillugu angajoqqaanngorluni inooqatigiinnermi ineriartorneq pillugit siunnersuisoqartarpoq. *MANU aqputigalugu pikkorissartitsinerit* aamma angajoqqaat angajoqqaanik allanik naapeqateqarsinnaanerannik periarfissiipput, tamannalu aqputigalugu angajoqqaatut misilittakkanik avitseqatigiittoqarsinnaalluni.

*Siusissukkut suliniutit* ilaqtariinnut immikkut atugarliuutilinnut neqeroorutaapput, tamannalu aqputigalugu sumiginnaanissaraluit pitsaaliornissaat siunertaralugu meeqqat pisariaqartitaat ikiorserniarlugit ilaqtariit ikiorneqarnissaat periarfissinneqarluni. *Siusissukkut suliniutit* peqqinnissaqarfimmi kommuninilu sullissisut peqatigalugit suleqatigeeriaaseq malillugu ineriartortitaapput. Ilaqtariit angajoqqaatut pisinnaasaasa patajaallisarnissaat aamma sumiginnaanerit kiisalu meeqqanut ataasiakkaanut, ilaqtariinnut inuiaqatigiinnullu sumiginnaanerit annertuumik kinguneqarsinnaanerisa pitsaaliornissaat *Siusissukkut suliniutini* siunertarineqarpoq.

Tamatuma saniatigut kommunit amerlanerit ilaqtariinnut siunersieqatigiinnermik neqerooruteqartarput, tassanilu ilaqtariit tamarmik nukissaqartut - aamma ilaqtariit inuuniarnermikkut ajornartorsiutillit aallaaviupput. Ilaqtariit siunersieqatigiittarneranni ilaqtariit ilaqutaasunik, ikinngutinik imaluunniit inunnik meeqqap inuuneranut pingaarutilinnik naapitsisarput. Meeqqap ilaqtariillu inuunerat qanoq iliornikkut pitsaanerulersinnaanersoq tamarmiullutik eqqartortarpaat. Siunersieqatigiinnermi ilaqtariit meeqqallu nipaata tusaaneqartarpoq, tassani siunissami qanoq pisoqarnissaanut aalajangernissaminnut periarfissinneqartarlutik.

Tamatuma saniatigut sorpassuartigut ilaqtariinnut atugarliortunut ikiuinissamik siunnersuinissamillu neqeroorsinnaasunik kommunit tamakkerlutik illoqarfiit amerlanersaanni nunaqarfinnilu ataasiakkaani ilaqtariinnut sullissiviuteqarput. Innuttaasut ilaqtariillu ilaqtariittut katsorsartinnissaannik, siunnersorneqarnissaannik aamma ajornartoornermi ikiorserneqarnissaannik neqeroorfigineqarsinnaapput. *Ilaqtariinnut sullissiviit* aallaavimmikkut ilaqtariinnut tamanut akeqangillat. Ilaqtariinnut sullissivik ilaannikkooriarluni aamma atuarfinnut, ulluunerani paaqqinnittarfinnut peqqinnissaqarfimmullu siunnersuinermik suliaqarsinnaavoq.

Angajoqqaanut neqeroorutigineqartut siuliani taaneqartut saniatigut nunatsinni Allorfiit aqputigalugit aanngajaarniutinik atonerluisuunermut aamma aningaasanoorajuttuunermut katsorsartinnissat neqeroorutaapput. Katsorsartinnissamut neqeroorutit qanigisaasut ikiorneqarnissaannik aamma imaqarput. Sumiginnaanermut tunngatillugu suliat amerlanerpaartaat atonerluisuunermik aningaasanoorajuttuunermik pissuteqarput.

**a. Isumasioqatigiittarfimmik imaluunniit siunnersuisarfimmut ornigutissagaangamik kikkut sullissisuusarpat?**

Apeqqut 2 a-mut akissut innersuussutigineqarpoq.

**b. Qanoq ilinniagallit imaluunniit qanoq?**

Katsorsaasut tamarmik ilinniagaannik tunuliaqutaasut pillugit paasissutissiisoqarsinnaanngilaq.

**3. Angajoqqaat Illersuisuannik pilersitsisoqassappat aamma Angajoqqaat pillugit ilisimasanik katersuiffimmik pilersitsisoqassappat qanoq tamanna inuiaqatigiinnut naleqassava?**

Angajoqqaat Illersuisuannik imaluunniit angajoqqaanut tunngatillugu ilisimasanik katersuiffissamik pilersitsiniarlutik Naalakkersuisut massakkorpiaq pilersaaruteqanngillat. Aningaasartuutaasinnaasunut naatsorsuisoqarnikuunngilaq.

Inussiarnersumik inuulluaqqusillunga



Martha Abelsen